

KUMPUAN
RAM LEH HNAM
HUMHALH

YMA

AW



CHANMARI WEST BRANCH YMA CHANCHINBU KAR TIN CHHUAK. VOL. XXIII. ISSUE NO.48 25th Nov., 2012

Branch Executive Committee an meeting

Chanmari West, 25th Nov : Ni 20.11.2012 zan khan Pu R. Lalmalsawma inah Chanmari West Branch YMA Executive Committee chu an meeting. He meeting hian Ni 11.12.2012 a kum 2013 hruaitu thlan tum chuan an ennawn a, hun pawh duan fel a ni a, nomination list pawh siam fel a ni.

Meeting hi Pu T. Ngurkhuma chuan a kaihraua, Ni 11.12.2012 (Thawhleh) zanah hian Krismas Carol Service hun hman tum a ni a, Zan tirah Zawlbukah hun hmasa hman phawt a, mitthi sunna hun hman a, mi harsate pualin thawhlawm lakkhawm tum a ni bawk. Zaihona hun hman a, chuta tanga kalchhuah a, veng chhung fanchhuah a, YMA Park-ah a kharna hun hman tum a ni.

Ni 22.11.2012 (Inrinni) ah hian Section, YMA AW leh Branch sum audit tura rel a ni bawk.

Tunlaia Central YMA-in inthendarh zawnga hmalakna a duh loh chungchang leh chibing pawl hrang hrangte hmalak dante sawifiah a ni a, hemi kawngah hian Mizoram thendarh zawnga hmalakna chuan do zel tum a ni a, mizo inpumkhat zawnga hmalak zel pawh a tum bawk a ni.

YMA MEMBER NIHNA HLIHSAK

Kan Branch YMA member Tv G.. Lallawmawma S/o G.. Zama, Neuva Section chuan Ni 17.11.2012 (Inrinni) tlaia a zuruiin an In luau Pu Ricky Lallawmawma, an In chhungah luh khungin, a cho va. Ricky-a chuan zaidawh taka a tih let loh chung pawhin buaina siam zawnga a awm reng a, Ricky-a hian buaina chhuak lo tura a duh avangin, Neuva Section YMA hruaitute a pun a, YMA hminga kal, Neuva Section YMA Secretary Tv R. Laltlankima pawh hruaitu a nihna zah lo taka a tih avang leh a malpui a thisen chhuak khawpa a seh hi pawi kan ti in tha lo kan ti a,

Chuvang chuan Ni 21.11.2012 (Nilai) zana Zawlbuka lo kal a, hruaitute nen thu sawiho tura kan tih chu, kan hruaitute bulah ngei a kal loh tur thu a sawiin, a kal lova. Ni 22.11.2012 (Ninga) zanah koh leh a ni chung pawh a a la kal lo fo hi pawi kan ti tak zet a ni.

YMA hian vawi eng emaw zat mi koh kan lo nei tawh a, YMA koh a kal lo hi sawi tur kan la hre ngai lo.

Tv. G. Lallawmawma hian mi in chhunga buaina siam zawnga a awm bawk.

avang te, kan YMA hruaitute zah lo taka kut a thlak avang leh, vawi 2 koh a ni chung pawha a kal loh chungchangah Ni 22.11.2012 zana joint meeting chuan hetiang hian a chungah action lak nise a ti a ni.

1. YMADan Bu Bung III, chang 17 (2) a YMA Member nih dan a sawi angin, kum 2012 chhung atan kan Branch YMA Membership fee Rs 5/- a pek avangin member atan pawm a ni a. Dan Bu Bung III, chang 21 (1) in Member nihna hloh dan a sawi anga, Bung III, chang 17 na kalth zawnga a khawsak avang hian, kumin 2012 chhung atan YMA member a nihna chuhlihsak (Member atanga pah) a ni a, membership fee Rs 5/- a lo pek tawh chu pek let nghal a ni. Tun atang chuan YMA Member a ni tawh lo a ni.

2. A awmdan/khawsak danah Chanmari West Branch YMA hruaitute hi hruaitute kan nihna anga zahna leh an thu awihna a neih loh bawk avangin, Kum 2013 leh 2014 chhung atan hian Chanmari West Branch YMA member a awm rem tih a ni lova, YMA thiltihna reng rengah a tel phal a ni lo bawk.

Branch News

Branch Executive Member Pu VL Thakima, Pu Lalriniana, Ni Lalramengi te chu Presbyterian Kohhran Work Camp in Tripura-ah an kal a, dam takin an lo haw e.

Branch Executive Member Pu Lalmalsawma (Sena) chu Champhai PHE Circle a S.E tura sown a ni chu kan ui hle.

Ni 29.11.2012 (Ninga) dar 10:30Am hian Indoor Stadium-ah Roll Hearing tur a ni a, hetah hian Branch OB leh Section tin atangin mi 2 theuh YMA atanga duty tur a ni e.

Kum 2013 chhunga kan Branch YMA hruaitu turte thlanna leh Carol Service kan neih turah a bik takin YMA member ten ngaih pawimawh turin kan innge lawk a ni.

Pu Lalrinawma Hnamte te chhungkua 'K' Section a mite chuan No 10 dozs Branch YMA te min rawn pe a, an chungah lawmthu sawi a ni.

NGENNA

Kum 2012 Krismas leh 2013 lo thleng turah kan vengchhungah Halpuah leh Halmawi lam chi hal lo turin kan innge. Silai lem a mu nei chi pawh khap a nih avangin nu leh pate pawhin kan fate tana leisak lo turin kan innge a, dawr neite pawh Halpuah leh Halmawi lam chi leh silai lem a mu nei chite zuar lo turin kan innge a ni.

LAWMTHU SAWINA

Ni 2.11.2012 khan Bialtu MLA Pu Lalthanzara chuan Computer set 1 min pe a, Chanmari West Primary School zirlaite leh zirtirtute kan lawm em em a. Min petu chungah lawmthu kan sawi tak meuh meuh a ni.

Headmisstress & Staff
Chanmari West P/S



TUNKAR CHANGAWN

Thinlung hlim hi damdawi tha tak a ni a, thinlung lungchhia erawh chuan ruh a tiro thin.

Philippi 3 : 1

Editorial Board

Editor:	J.Lalnangliana	9862399658
Joint Editor :	Lalchhandama	9862358347
News Editor :	Thangkhuma	9862303135
	R. Lalrinngheta	9862358337
	Jacob Lalrinsanga	9612319779
Cir. Manager :	Johny Lalthanpuia	9612359161
	EVL. Hruaitluanga	9862655426
Production Manager :	R.Lalhmachhuana	9436151817

Branch Office Bearer

President	T. Ngurkhuma	9436190843
Vice President	R. Lalhmachhuana	9436151817
Secretary	RL. Thanhnuna	9436152760
Asst. Secretary	Zairemmawia	9862385654
Treasurer	C. Lalzarliana	9436142049
Fin.Secretary	K. Darthantluanga	9436196071
Adviser-te :	Pu Lalbiakthanga Khiangte	
	Pu Rothuama, Pi Zamanthangi	
	Pu Lalrengpuia Sailo	

Editorial :

Kan hun tawnah thil mak tak a thleng a, a pawi khawp mai. YMAte hi khawtlang leh hnam tana thawk kan ni a, kan thiltih hi sawisel thiango leh kah thiang lo chu a ni ngai lo na a, finchhuah erawh a thiango a ni.

Chi bil leh hnam bil chungchangah harsatna kan tawk a, YMA chuan mizo hnam hi tha leh inhlawm, inngeih taka a kal a duh a, chutiang tur chuan hma pawh a la thin a ni. Hetihlai hian hnam tlem zawkte chuan he hmalakna hi an duh lova, an kah a, an hnial a ni. Kan thlirna tlang a inang lo pawh a ni mai thei a, kan dinna pawh a inang lo mai thei bawk. A pawimawh ber chu Mizo hnam hlawm tha taka kan awm tlan hi a ni, kan awm khawm that hian hnam dang leh ram dang lakah kan lang mawi ang a, kan ropui bawk ang.

Kan vengah pawh YMA hruaitute zah lohna nasa tak a thleng a, a pawi hle. Kan theih ang tawka thiltha tih tum kan ni a, YMA hruaitute hi zah tlak loh leh zah phu loh pawh anni mai thei; mahse, Mizo hnam tana ding an nihna leh harsate tanpuitu a ni avang tal pawh hian an thuawih hi kan ba a ni. Kan that tlan zawk nan member zawng zawngte hian kan hruaitute thu hi i awih tlang vek ang u.

2012 Thuvawn

*I awmdan tur chu
LALPA chungah ngat
la; Amah chu ring la,
aman a ti vek ang.*

Article : Pu James-a atangin Masangtea hun thlengin a la ngai reng

- Thangkhuma

Pu James-a hun atanga Masangtea vanglai kan hman mek thleng hian YMAAW hian mimai, pawl leh veng chhung tan hlutna tam tak a nei a, an zinga tel ve nual tawh ka nih avangin lawmna tur tam tak ka nei.

Kum 20 tlin hma atangin hruaitute duhsakna zarzovin ka tel a, tun thlengin a tikimtu zingah ka la awm ve a, mite hian mahni hlawkna tur ni lova mi dang tan, veng tan, pawl tan inpekna an neih sanzia hi kum tin, thla tin, kar tin hmuh tur a awm a, a ropui.

Chanchinbu buatsahtute inpekna hi mi dang tana ngeiawm thei khawpa sawi vung vak a hlauhawm a, peng pakhat ve mai a ni tih hriathiam a tha hle. Amaherawhchu, YMAAW chhung bik kan sawi miau avangin thil dang a leng lo va, YMA huangah ringawt pawh khawtlang leh veng thatna tura mi inpe leh tha leh tui seng nasa an tam a, branch, section, sub-committee leh peng tinah rintlak leh fak tur thler tinah hmuh tur an awm a, veng timawitu pawh an ni.

Mahse, hman atanga tun thlengin Pu James-a'n an tuipui tlat thin, Masangtea'n a thlahthlam theih loh he kan veng YMA chanchinbu hi bul leh tawp nei lo ang maia chatuan daih tur ni lo mah se, he thil avanga thil thleng tawh leh thil thlen dan bakah a behbawm thil hlimawm leh nimawm chenin, inzirna leh infuihna tangkai tak a ni. Veng chhungah mi leh sa kan inpawlhsawp tial tial a, kan tam zel a, thil thleng kan hriat chian loh telh telh tak avangte hian chanchin inhriatpawhna tha a ni deuh deuh.

Cyclostyle-a her thin laia buatsahtute a hautak dan leh a buaithlakzia chu thai lan a ni tawh a, computer hman a nih tak hnu hian zirtawp zan apiangin kalkhawm ziah a la ngai tho. Khawl tha tak tak hman ni tawh mah se tha thawh a la ngai vek a, khawvel changkangna avangin thiltih a awlsam viau tawh na a, zan mei rei leh rim taka thawh a bang chuang lo va, khawlin min chhawk zangkhai tawh nge a hmaa typewriter hman lai ai khan a hah zual an tlem ta deuh chauh tih pawh chhut tam tak a ni tho mai.

2002 khan editor-ah min ruat a, cyclostyle hmanga her hnuhnun ber kum a ni a, mual min liamsan ta Vanlawma leh kumina editorial board zinga mi Mangheta leh mi dangte nen phur taka YMA AW kan buatsahtute a la ngai reng a lait kha mitthlaah a lang.

U Dailova, U Nunthara leh U Rovate'n min ho va, anni bak kum 30 aia 20 hnaih

zawk thlalai rualin kan buatsahtute a la ngai reng a ni a !! Kan thu chhuah puitlin leh puitlin loh lam ai chuan hruaitute'n naupang zawk chunga mawphurhna sang tak an ngat hnuhmate rilruah letin thil lawmawm a tlingin ka hria.

Mualpho em em lovin kum a liam a, hemi kuma editorial board-a mite hi tun thlengin YMA huang leh veng chhunga mi tangkai an ni fur a, Kimtea Sailo (T section secretary) pawh a tel ve nghe nghe a, badminton a khelh hma niin a dul pawh a la kiar lem lo.

2003-ah editor turin min ruat nawn leh a, cyclostyle leh typewriter hnuchhawnin computer age-ah tak tak kan lut ta rup a, thil inhlak hlawk a awm hian insiam rem ngthal mai a harsa thin. Abuai kan tlem ta deuh va, zangkhaina tha tak a ni laiin thiam thil a ngai lehzual a, chu chu a buaithlakna lai a ni ve leh zel bawk.

Tichuan, hun leh kumte a kal zel a, YMA hausakna hmuh tur a awm hnem tial tial a, khawl lama mi thiam leh mi inpe an rawn chhuak ve zel. Pu Chhuanawma'n hmel chhia a tih em em Dawngtea'n min pemsan tawh mah se khawl chhia siam zar zar thei mi inpe tak a nih avangin, a hnuhmate rilruah a la cham reng.

Dawngtea a liam a, U Nunthara'n a thenawma mi Zoroma a rawn chhar chhuak ve leh a, khawl chhia siam mai thei kan nei leh. Tunlaiah chuan editorial board-ah hetiang mi thiam pakhat tal an awm ve hi a tha em em a, Pa Dinga a rawn lut bawk nen a chhe siam lamah na na na chuan 2008 chho kha chuan changtlung tak kan ni.

Pa Dinga phei chu 2011 khan editor-ah ruat a ni a, khawl a chhe hman tawh lo. Kuminah Nanga hovin kan han buatsahtute a, hmania tute emaw ang mai khan ka kal leh kal loh a lang lo hle a, YMA AW-a tel ve kan inhah hleihzia min awl hneb em avangin ka hrethiam. Editor a rin ngam a, thawhpui dangte nen inpeizawn tlangin tlawmnagaih vanga chawimawina dawng tawh Mahruua leh Laljohny-a an awm a, Laljohny-a chungchang hi tunah tak chuan a taka hmuh aiin lawmman a dawng tawh tia sawifiah kher a ngai ta tih mai loh chu !

Chutah computer zirna hawng ngam leh rintlak CHDA-te kan kawl a, N section leader nih pahin kawng hrang hrangah kumin hian kan changtlun phah a, khawl a him a, a dam tha hle bawk. Chanchinbua thu chhuak lam (phek linaah zawm a ni...)

TAITESENA

Ni 27.11. 2012 (Thawlehh) zan hian NI PC.Lalrindikite Inah section Committee meeting tur a ni a, hruaitute hunawl lo insiam turin an innge.

Ni 27.11. 2012 (Thawlehh) zingah hian Pu Lalnunthiangate lung thiar hnatlang tur a ni a, member zawng zawngte hawkchhuak turin an innge. Disaster Management Committee ten inhlawhna an siamsak avangin an lawm hle.

Ni 23.11. 2012 (Zirtawp) zing atang khan an Project zun In sak na tur laih a ni a, Ni 24.11. 2012 nilengin chhunzawm a ni a, zun In sakna tur hmun petu Pu R. Thangdailovate chungah lawmthu an sawi.

Ni 23.11. 2012 zan kahn Pu Lalnunthiangate lung thiar a hnatlang a ni, inhlawhna siamsaktu leh member hawkchhuakte chungah lawmthu an sawi.

Section YMA in sumtuak hnatlang an ko fo va, nu leh pate leh member ten in lo hriatthiam, an ngen mawlh mawlh a, a chhan chu Krismas vuak vetah duty-te tan sum tam tak an mamawh a, hei bakah hian mi harsate tanpui an duh bawk. Nu leh paten kan fate thawh chhuah tir thin turin an ngen nghal bawk.

Ni 15.11.2012 zana Nu leh Pate leh hruaituten join meeting minute chu peih fel a ni tawh a, Bial hruaituten an bial theuhah a rang thei ang ber a sem chhuak turin an inhriatitr.

Vaivakawn nena kan inrina Welcome Signboard chhia chu siamthat a niin, tar nghal a ni a, a tul ang a min buatsaih sak tu Pu C. Zonunsanga chungah lawmthu an sawi. Section hruaitute Tv. Lalbiaksanga Asst. Secretary leh Pu Lalngaihawma Com. member Work camp kalte chu tluang takin an lo thleng leh ta, rinna kawngah pawh an chak phah sawt an beisei.

KHUANGCHERA

An Asst. Leader, Pu Lalriniana workcamp kal chu damtakin a lo haw a. An hruaitu Pu HV Lalthavela hna thila zin pawh damtaka a lo haw leh thuai an beisei.

Ni 29.11.2012 (Thursday) zan dar 7:00-ah Sport hawnna Indoor Stadium-ah neih a ni dawn a. Hemi zan hian Volleyball mipa leh hmeichhia khel nghal tur a ni a. Member zawng zawng kal vek turin an inhriattir.

Vawiin tlai dar 3:00 hian Section OB-te leh Sport Organising Committee member-te Pu Lallian-sanga te inah kalkhawm tur a ni.

CHAWNGBAWLA

"Pu Chunga Memorial Essay Competition" an buatsaih a, thupuiah "CHANMARI WEST HMATHLIR" (YMA lam atangin) tih a ni. A sei zawng hi thumal 1000 bawr vel tur a ni a, Lawmman tha siam a ni a, heng lawmmante hi Tv H. Lalrinmawia chuan a tum dawn a ni. Ni 30.11.2012 aia tlai lovah Section Secretary hnenah theh luh tur a ni ang.

Ni 12.12.2012 (Nilai) zan inkhawm banah hian Section Project closing function ropui taka hman tum a ni. Solo leh Beat Contest-a hun hman tur a ni. Active Sound tha hman tur a ni a, Apple Band-in zaiin min awi bawk ang. Heng hruaitute atang hian sponsor hmuh a ni, Tv Lalsawmzuala'n Active sound, Pu JK. Zosangliana'n Rs 3000, Pu K. Lalthakima, Pu Rosangpuia, Dr. Lalramliana, Pu Lalruatsanga, Pu R. Lalbiakhluna, Pu Lalbiakzuala, K. Lalsangzuala, Pu Vanlalngheta leh GM Enterprises ten Rs 500 theuh, Pu Vanlaltlana leh Pu R. Lalhmingthanga ten Rs 100 ve ve, an chungah section committee chuan lawmthu a sawi.

Branch-in coral leh inthlan hun an buatsaih tel theuh turin an memberte an ngen.

VANAPA

Vanapa chanchin (Essay) ziak zo tawhte chuan Pu H. Vanlalvena emaw Tv R. Lalrinnghta te hnenah copy 3 thehlut turin an inhriattir. Essay thehlut zawng zawngte hnenah lawmman pek a ni ang.

An Leader Pu VL Thakima leh Comt. member Pu R.Ramlawma te Work Camp (Tripura) lama kal pawh dam takin an lo haw leh ta.

An Secy Tv Hminghana dam lo chu a that leh thuai an duhsak.

Section chhungah ui ek hmuh tur a tam leh tawh viau mai a. Ui vulhtute mahni ranvulh khuahkhirh tha turin an ngen nawn leh.

An member Pu Jimmy VL Hruaia, hun engemaw chen damdawi in lama in enkawl chu a lo chhuak leh ta a, a damthat zel an duhsak.

Section chhunga tuikhurah insuk leh inbual, pipe hmanga tui lakte khap a ni. Hei hi Local Council thuchhuak a nih avangin zawm theuh turin mipuite an ngen.

Section chhungah bengchheng siam lo turin an innge a, naupang khawlaia leng tam lo turin an inchah bawk.

Pu CL. Thianglima kawmchhaka Ganja zu a, thukhgawm thinte chu sim turin an ngen.

NEUVA

Ni 23rd November 2012 (Zirtawp) zan khan Neuva Section Sport - 2012 chu !st Season ah Pu Lalchhandama, Leader kaihruaina in NI Jenny VL Dinpui'n thiam taka hla a sak hnu in Pu R.Lalhmachhuana, OB incharge in ropui takin a hawng a ni. Section memberte hi Group 4 heng.: Tuaisala Group, Thinlanga Group, Chhurbura Group leh Chemtatratta Group ah te in then a ni. 2nd Season hi Pu Lalthanruma, Asst Leader in kaihruaiin Solo Competition neih nghal a ni. Ni 24th Nov 2012 (Inrinni) khan Indoor stadium leh Middle School ah nileng in Group hrang hrangte, infiamna hrang hrangah in el chhunzawm nghal a ni bawk a, member kal an thahnem hle mai chu committee chuan lawmawm a ti hle a ni.

An hruaitu Pu Vanlalvuna Nupui Pi Lallianzami Rilphir zai chu a dam that leh thuai an beisei.

Ni 27th Nov 2012 (Thawlehh) Zan dar 7 ah YMA Member te YMA Zawlbukah Corrom Board, Draft Board leh Chinese Checker te khelh tur a ni a, Member zawng zawngte kal theuh tur a ni a. YMA Chhang tan Pasaltha Neuva Inah Computer Games (NFS) khelh nghal tur a ni bawk a, YMA Chhang zawng zawng kal vek tur a ni.

Ualau tak a Sub-Centre kawt a zu in thinte kha, ti tawh lo tur a ngen leh hriattir in ni e.

Naupang pual Drawing Competition a an entawn turflawm taka print saktu Pu Lalnunthara Sailo (Gemini Enterprises) chungah lawmthu an sawi.

PEM LUT

C. Lalchhanchhuaha te unau chu Thingsulthliah, Diakkawn atangin Pu Zothangzuala Chhangte 'K' Section te In ah an rawn pem.

PEM CHHUAK

Pi Lalthakimi te chhungku chu Pu Vanthang(L) 'T' Section te In atangin Zonuam-ah an pem

KEIMAHHNI

Aitonee International chuan kan thingpui hmeh min tum sak a, an chuangah kan lawm hle.

Ni 2.12.2012 (Pathianni) tlaiah hian Pasaltha Neuva Inah YMA AW semtute thil pek kan tum a, he hunah hian YMA AW semtute kal vek turin kan ngen e.

(phek hnihna a mi zawmna...)

chu eng pawh ni se, engkim famkimna chu kan zingah 'amah Masangtea' kan a awm. Thurawn engkim kan lakna ni hran lo mah se awiawm taka a lo thu ve ringawt hi chatuan lungpui la hmu lo tan pawh thlamuanpui tham leh mikhual tana hlauhawm a ni hrim hrim.

Hmana thu ziak tha duh lo Mangheta'n taima takin a ziak peih a, hman hmanah ziak tawh se tha tur tih mai a awl hle. Chutih laiin kumina board member-te erawh chuan kan chhaw em em a, thu chhuah tur kan haihchham changa kan pur chawkna lian a ni.

Hetiang mi hi awm belh zel se malsawmna a van ni dawn em !! V section secretary Pa Hminga'n phur hlut lai an nei pawh hi kan ziaawm phah a, tun ai hian phur ngun deuh se thu chhuah tur kan ngah ang. Mahse, kar tin kar tawp a awm ziah ang hian Pa Hminga pawhin a thil vei puan chhuah nan thu a ziak ziah a, ka rilruin ziak ngun deuh se tiin ka tur mah mah pawh a ni mai thei.

Kar tin tihchuah a ngai a, thu chhuah tur a tlem chang hian editorial board lam thlirna atang chuan kan vengah, thalai zingah thu ziak peih an tlem tial tial emaw tih a awl hle. Hemi kawngah hian kut hlei lehzual ila, malsawmna leh hmasawnna tha a ni lo thei lo.

YMA AW hi nuam ti taka buatsaih a nuam a, ka thiam leh thiam loh chu thu hran ni se ka tui vena lam a nih avangin hrehawm tih hlauh hlauh ka la nei mang lo niin ka hria. YMA AW buatsaihu zinga ka tel hi miten tlwmngaihnaah min ngaihsak a nih phei chuan ka vannei lehzual ngawt ang.

Boruak nuam leh hlimawm taka inkawm chunga kan buatsaih theite hian a ninawmna leh hrehawmna min pumpelhtir a, mal taka buatsaih aiin a huhova tih a nuam a, board chhunga tute mai pawh hi kan pawimawh tlang em em. Kan hravitate leh mi dang tute pawhin kan hnathawh min pawmpui min hriatsak a ni tih kan hriatte hian a nuam lehzual a, kum khat chhung board member-a awm tlang tawte hian hun kal zelah pawh innelna tak kan nei a, chhung ril taka inpawhna pawh kan hriat miah lovin min siamsak thei niin a ka hria; thian siam thiam lo tak ni mah ila, kan veng kil tinah YMAAW avangin thian tha tam tak ka neih phah miau a ni.

VCHN WELFARE

Chanmari West veng chhung V Sect hnuai lam, CH Sect hnuai lam leh N Sect chung lama awmten kawng hrang hranga hma an sawn theih nan tangrual pawl 'VCHN Welfare din a ni a, hravitate lailawkte :

Chairman : Pu K. Lalramzauva
Vice Chairman : Pu NK. Siama
Secretary : Pu JH. Hmingthanchuang
Asst. Secy : Pu Lallianzauva
Treasurer : Pu H. Lalthuama

ZOFA NEWS

» An Vice President, Pu VL Thakima, Work Camp-a Tripura lama kal chu dam takin a lo haw leh ta.

» Ni 30.11.2012- a Hmuifang a Thalfavang Kut neih turah Khuallam entir tura sawm an nih angin an inbuatsaih mek a. Ni 27.11.2012 (Thawhleh) zan dar 6:30 hian Indoor Stadium-ah Lam hi zir leh tur a ni a, member-te kal theuh turin an inhriattir.

VOLLEYBALL MANAGING BOARD

» Ni 30.11.2012 (Friday) hian Ist Division Super League Tuikual Indoor Stadium-ah 3rd MAP nen Opening Match khelh an khel dawn a. Inrinniah BSFnen an khel leh ang. Veng mipuite tawiawm turin an sawm a ni.

» 2nd Division players-te tan Special training nei tura ruahmanna kalpui mek a ni.

Lawmthu sawina

Court thuremnain Chanmari West UPC Biak In Mizoram UPC kuta a hlan hnuin, Dt. 1.12.2012 (Inrinni) dar 11:00 am hian a hawn a ni dawn a, hemi pual hian Upa Lalzirlianate chhungkuain ran talha Pathian hnena lawmthu sawina an nei nghal ang.

Min rawn hmanpui tur hian Chanmari West khawtlang nu leh pa, he Biak In-a lo lawi tawh a duh apiang Lalpa hmingin kan sawm a che u.

A hmun - Chanmari West Mizoram UPC Biak In

Ahun-Dt 1.12.2012 (Inrinni) 11:00Am Hawngtu tur-Rev. H. Vanlaltlana, General Supt, Mizoram UPC

CWSC

» Ni 29.11.2012 (Ninga) zanah hian Executive Committee meeting tum a ni a, memberte hunawl lo insiam turin an ngen.

RSBY LEH MIZORAM HEALTH CARE SCHEME REGISTRATION

Date 26.11.12 (Thawhtani) atanga 3.12.12 (Thawhtani) chhung hian RSBY leh Mizoram Health Care Scheme Sub-Centre-ah Registration tih leh tur a ni.

RSBY-ti thei tur te chu Health Department BPL a tel ngei an ni tur a ni a, Rs. 30 leh chhungkaw hotu ber ID Card ken tur a ni. Health Department BPL- a tel leh tel loh hre duh chuan Sub-Centre-ah list entheih a ni.

Mizoram Health Care Scheme: Ahnuia ziah ang hian registration a tih theih a, APL chin Health care ti duh tan chhungkaw hotu ber ID card ken tel a ngai.

Bill theih chin	Chhungkaw member 5 chin tan Registration man	Chhungkaw member 5 aia tama member 1 zela registration man pek belh tur
Rs 70,000 thleng	Rs 500	Rs 100
Rs 1,70,000 thleng	Rs 750	Rs 200
Rs 2,70,000 thleng	Rs 1,000	Rs 300

SMS

SMS thawnna tur : 9862358337.

» Primary Sikul kawt, Transformer bul vela zu in thinte khan sim tawh ula kan ti hle mai.

9612319779

» U.P.C. Biak In chhak kawngpui anah hian motor dah (parking) phalna 'permission' nei an awm bik em ni le? A bik takin MZ-01 7385 hian tu hnenah nge phalna a lak bik? Dah thei leh thei lo an awm em ni?

9774401512

SMS kan dawnte hi Editorial Board ngaihdan a ni vek kher lo.

Central YMA

» Central YMA hnuia IGNOU Special Study Centre-ah, Bachelor Preparatory Programme, BA zirna kailawn, Diploma in Early Childhood Care & Education leh Certificate in Disaster Management-te chu Ni 30.11. 2012 thleng admission a la tih theih a, zir duh ten a rang lamin Central YMA Office-ah emaw, Coordinator Dr. C. Lalthenglana (9612163379)-ah zawhfiah theih a ni..

LOCAL FOOTBALL TOURNAMENT

- A hun : Ni 29,30 November 2012
- Entry fee : Rs 200
- Entry Fee pekna : Tv R Lalfakzuala,
- Organising Secretary CH-section
- Hriatturte
- 1. Ni 26.11.2012 zan inkhawm banah
- Chanmari West High School-ah Tie
- draw a ni ang, team-te kal vek tur a ni.
- 2. Entry Fee hi Ni 25 November 2012
- thleng pek theih a ni.
- Organised by
- Congress Thalai Unit-1 (2-2)